

5403/82 (1-10)

10

RECEIVED
LIBRARY OF THE
UNIVERSITY OF CHICAGO
CHICAGO
NOV 3 1911

HARVARD-YENCHING LIBRARY
HARVARD UNIVERSITY
2 DIVINITY AVENUE
CHIAOLI
NOV 3 1967

太師誠意伯劉文成公集卷之十九

東嘉裔孫歲貢生標孤嶼元奇重梓

春秋明經

公朝于王所仲孫羯會晉韓不信

云城成周

哈佛大學哈佛燕京
圖書館珍藏印

春秋與諸侯之覲王而惜王所之非其地與大夫之勤王而傷王城之同于列國夫趨事赴工者臣子之所當爲至于天子之守則有先王之遺法焉襄王下臨僖公有王所之朝春秋書公而成其爲朝謂天子在是諸侯不可以不朝也然不言明堂而曰王所則所非其地異乎先王方嶽之禮矣敬王命城王都而諸大夫有成周之城春秋列書大夫之名氏謂

天子有命諸侯不可以不從也然不言京師而曰成周則同於列國而異乎先王作京之意矣然則流水之朝宗葵藿之向日固人子之至情也而下堂以見諸侯與城郭溝池以爲固者又豈天子之盛事哉嗚呼此聖人之所以不責諸侯大夫而深不滿於王室之意歟是故至于岱宗肆覲東后天子巡諸侯之守者然也未聞下勞諸侯而臨于非所之地也王命仲山甫城及東方天子徹諸侯之封者然也未聞請於諸侯以城其所都之邑也平輒旣東周綱解紐歸枋邑易許田而朝覲之禮委諸草莽賦黍離歌束楚而二雅之音變爲國風於是霸圖興而王道絕矣推原其由豈非天王自失其道

而致之哉觀春秋之所書然後正本澄源之意可得而知矣且蠻獍猾夏寇賊姦宄惟是大侯小伯所當攘斥非異人任則夫城濮之勲因其獻俘而錫命之賜之弓矢以旌其勞可也何至屈萬乘之尊親舉玉趾以勞晉侯于踐土乎縱自輕也奈宗廟何成康之時巡宜不如是春秋安得不以爲貶哉然而君雖失禮臣不可以不盡其敬是故諸侯就朝雖無爲龍爲光之盛而冠冕佩玉覲天威于咫尺猶足以明水木本源之義謂非東遷以後之美事不可也是故我公書朝以成其禮故曰春秋與諸侯之覲王而惜王所之非其地也嬖子匹嫡亂生不彛惟是二三大臣相與僂力以不隕墜則夫定

詩經什文集
位之後所當夙夜夤畏任賢修政以圖轉危而爲安也何至以四海之廣請城其都以爲固乎德則不競城郭何爲周公之作洛宜不如是春秋又安得而不譏之乎然而上雖失政下不可以不奉其令是故大夫會城雖有弗躬弗親之責然版築雉堞服王事而靡盬亦足以存宗邦翰屏之典謂非土室亂以後之美事不可也是故諸大夫書名以達其義故曰春秋與大夫之勤王而傷王城之同於列國也夫春秋天子之事也故其自治嚴而待人怨惟其自治之嚴故周之不振爲可貶惟其待人之怨故或成其朝或與其城而無責焉雖然二百四十二年之間書公之朝者二而皆于王所則言外

之意可知矣書大夫城成周而無諸侯則屬辭之法又可見矣然則二役也謂之免於貶可也而或者謂爲美之則豈聖人之意哉故嘗攷之周室在襄王則有子帶之難在敬王則有子朝之難子帶之難惟書天王居鄭至晉文納王則不書蓋以是爲臣子之常也子朝之難始末皆書而以城成周終之是果足以爲美哉嗚呼齊桓首止之盛不可及已得如晉文亦庶幾矣至于晉侯午者又文公之罪人也

築郟大無麥禾臧孫辰告糴于齊新延廐

諸侯興不急之役以空其國而取給于人猶不戒焉春秋比事而書之以示譏也夫國以民爲本而民以食爲本可不相

時而輕用其力也哉莊公妄興築郿之役而不計國儲之虛實至于麥禾皆無而當國之大夫親往告糴于齊其事急矣而明年之春又新延廐何其輕慢國本至于此極乎春秋比而書之而魯之君臣無務農重穀之實而有傷財害民之政可見矣吾聞古之爲國者必時視民之所勤民勤于力則工築罕民勤于食則百事廢未聞以凶年而興不急之役也三年耕必餘一年之食九年耕則餘三年之食未聞在位二十八年而無一年之積也魯之莊公則不然矣以峻宇雕墻爲無損以節用時使爲無益也是故築郿之工未畢而倉廩已空告糴之跡猶新而延廐復作曾謂君國于民之道而若是

乎宜其見譏於君子矣且築者剗作邑也城邑所以禦暴非時與制不敢興也况於無故而築邑乎莊公不視歲之豐凶而有築郿之役不知其何爲也若曰禦暴保民則魯國無故苟無令德太行孟門且不可恃而况於郿乎若曰虞山林藪澤之利則非君人之心矣未幾而倉廩盡竭麥禾俱無無而曰大顆粒不存之詞也然後皇皇焉無所措其手足而臧孫辰奔告于齊以請糴焉以千乘之國仰給于他人以活其民可不懼乎不曰如齊告糴而曰告糴于齊見其情之急也急病讓彘何足爲功適以昭其治名不治實之罪焉耳魯之君臣蓋亦因此而加省矣則又愈不知戒以求於人之餘而新

延廐夫延廐者法廐也養馬之所也凶年饑歲民食不給而馬廐是新推此心也不至于率獸而食人乎故書新延廐于告糴之後所謂時訓舉羸知其用民力爲已悉矣然則莊公之爲國也可知矣不然春秋書築者七而公有其四書興作者九而公有其三書無麥苗無麥禾而皆見于莊公之世何耶魯十二公臺池苑囿之役莫多於莊公而水旱螟蟻多麋有蜚之災皆備于莊公天人感應之理不誣矣而公終不寤也身死而妻子不保幾亡其國嗚呼豈他人之咎哉

初稅畝蠶生饑大有年

困民以致災者理之常悖道而獲福者理之變夫天人感應之理春秋之所深謹也是故螽蟴饑饉國之災也魯之宣公廢助法而用稅虐民也虐民而天降之災宜矣故所稅畝之年蠶生而饑斯非理之常乎百穀順成國之福也魯之宣公奪世嫡以有國悖道也悖道而天降之福異矣故卽位之十有六年而大有年斯非理之變乎在他人以饑蠶爲變在宣公則爲常在他人以有年爲常在宣公則爲變春秋誅亂臣討賊子之法嚴矣哉商書曰惟吉凶不僭在人惟天降災祥在德夫凶人爲不善而致譴焉天道之當然也其或反之者庸非異乎是故螽蟴之害法所當書而他公皆記有年之瑞法不當書而獨志于桓宣之冊聖人之旨淵乎微矣且饑者

五穀皆歉之謂也宣公以不義得國懼討于人而竭力以事齊水旱蝥螽相繼而起於是國用不足而稅畝之法興焉初者事之始也稅畝者公田之外又履其餘畝而取之是爲什而取二矣以諸侯而擅改先王之法以國君而行虐民之政由是怨懟之聲上聞于天而戾氣應之秋蝥未息冬螽又生螽者蝥之子也蝥螽相繼于二時嘉穀其有子遺乎故遂至于饑饉而無以振業貧乏春秋書螽生與饑繼于初稅畝之後則是災也實稅畝之應而宣公得之非過矣故曰困民以致災者理之常也若夫有年者五穀皆熟之謂也宣公以庶孽之子篡正嫡之位使惡視二子殞于非辜而過市之哭哀

動魯國是上不有王法而下不有宗廟王朝不能施殘執之刑隣國不聞有沐浴之請而魯國又無石碯之臣矣則惟天能誅之耳其乖氣所感兩蝥而一旱一水而兩饑宜也至于有年而大有年焉有年而曰大有則禾麻菽麥黍稷種稔實穎之明年則是福也非凶人之所當有而宣公得之爲反常矣故曰悖道而獲福者理之變也然則天道僭乎曰非也宣公在位十有八年而獨是年爲有年他年之歉可知矣越明年而宣公死矣獲罪于天者宣公也魯國之民不可盡絕而周公不可摧也稅畝矣饑矣而不畀之以有年則周餘黎民何

罪乎天非爲宣公而有年也夫豈僭耶或曰春秋之法常事不書惟變則書之桓宣之有年志變也則桓宣之水旱螟螽乃爲常矣何以亦書之乎曰春秋天子之事也天人相與之理懼災思患之意治惡人矜小民之道無所不備是故觀凶災之迭見于二公則知天道之不僭而爲惡者知所警觀有年之獨見于二公則知惡人之不可容於世而操刑賞之柄者可以知所主矣嗚呼至哉故曰孔子成春秋而亂臣賊子懼

晉卻缺帥師伐蔡戎申入蔡諸侯盟于扈

伯主能以力治二國而不能以義討罪人春秋比書而自見也夫諸侯從彛固伯者之所當問而弑逆之惡又烏可舍而不討也哉晉靈之時蔡從楚以次厥貉罪也故卻缺帥師伐蔡而入其國力有餘矣夫何齊有商人之亂則諸侯爲會于扈而受其賂何不以所治蔡者治齊乎春秋書伐蔡入蔡于前而不序諸侯於盟扈之役知晉之所以力爭諸侯者不過求逞其私耳豈其知有義哉嘗謂天下之事有重有輕故伯者之治有緩有急是故不能三年而總小功之察謂之不知務失肩背而養一指則爲狼疾人矣今也商人弑君告于諸侯已及暮矣伯主無致討之令而大夫無沐浴之請何其久也必有以也一旦上鄉授鉞鞬鞅鞞出自絳都意其事之

在齊也既而義旗不指于營丘之邦馬首乃瞻于淮西之境諸侯不無惑矣師及于蔡蔡人未服則以戊申之日鼓而入其國都以百里之侯邦倚蠻荆之勢援未易破也今以孤軍攻之而城郭失其守甲兵失其衛使蔡侯泥首受罪以爲城下之盟謂晉師不强而若此乎苟以此衆聲齊之罪師直而壯若舉江河以沃炎火商人之血何足以汗兗鉞耶奈何諸侯之會于扈名爲討齊實以取貨謂其力之不足乎則八國諸侯非直一卻缺之師也惟其不以賊爲賊而甘與賊爲徒也是故于扈未盟天下猶有所望而齊猶有懼也及夫于扈既盟然後天下絕望而商人成爲齊侯於是變討罪之師爲

成亂之會是舉諸侯而爲彘狄之行矣不亦甚哉春秋於伐蔡而書帥師書伐書入則其力之有餘可知盟扈略諸侯而不序則其義之不足可見而後討賊之功不足以蓋其縱賊之罪矣嗚呼中國之所恃以制彘狄者禮義而已有賊不討禮義亡矣雖得百蔡何益哉厥後遂習爲常至于陳夏氏之亂方以會狄爲務而楚莊遂爲辰陵之盟晉卒無以爲伯其來非一日矣今觀入蔡之役不足以離蔡于楚而盟扈之役反足以使魯從齊則晉人見利忘義之效也向使晉靈能移伐蔡之師于齊而冀缺能推不可以怠之心以納忠于盟扈之際則晉之世伯視文襄有光矣豈其有邲之敗哉噫

考仲子之宮初獻六羽取郛大鼎于宋戊申納于太廟
正樂用于別宮而非禮陳于祖廟聖人據事書之所以傷魯
之衰也夫禮樂者國家之本不可一日紊也隱公立宮以祀
仲子而樂舞之數用六用六雖正而獻于妾母之宮則非其
所矣桓公獎亂以立宋督而取郛大鼎之賂求賂立賊而納
于先君之廟豈不爲已甚乎夫君子之事其親也造次必以
其禮然則魯人之待周公曾仲子之不若矣嗚呼悖哉夫
妾不可以爲夫人未聞違禮立宮以祀之也宗廟禮法之所
在未聞昭違亂之賂于其中也魯於春秋號爲秉禮而若是
乎此聖人之所爲懼而春秋之所以深謹也蓋仲子者惠公

之妾也惠公元妃孟子旣入于廟則仲子無祭享之所矣若
以庶子爲君爲其母築宮而使公子主祭之典言之則仲子
非隱之母安得爲立宮乎至其樂舞之數則於別宮不敢同
於群廟而降用六羽自當時言之蓋以爲得禮矣以王制論
之則諸侯用六奚取於仲子之宮哉今也六羽獻于妾母之
前而群公之廟用八自若曾是以爲禮乎春秋因其始成而
祀書曰考仲子之宮旣正名其爲非禮矣獻羽而書初者以
見前此未嘗有六佾之舞所謂因事以明用八之僭也若夫
太廟者周公廟也曾謂周公而享非禮之祀乎猶有鬼神而
以不義之物陳于公前公其無所依矣不孝孰大焉桓旣篡

兄而立又推其惡以及於人於是偕齊鄭之徒成宋督之亂而取其賂器置于周公之廟是死周公也不惟褻祖宗之靈而又以教其百官習爲羹狄禽獸之行亂臣賊子得志而無忌憚至於此極哉春秋書取郟大鼎于宋取者得非其有之稱又書納于太廟納者不受而彊致之謂曰以戊申深謹之也夫六羽者當用之樂也而在仲子之宮郟鼎者違亂之器也而在周公之廟四方之人將於魯乎觀禮而魯之禮若是哉此春秋之所爲懼也因循至于僖公而有禘太廟致夫人之舉文公而有大事太廟躋僖公之事仲子猶別立宮而成風則直致之于太廟仲子猶降用六羽而成風則直用天子之大禘禮樂之紊旣不可言而亂倫逆理之事紛紛然於周公之前陳焉何周公之不幸至於此哉周家之禮公所制也而公之子孫若是他國復何望哉嗚呼此春秋之所以假魯史而作也夫

公會齊侯伐萊公至自伐萊大旱

人君以不義勞民爲可危故天應之災爲可懼甚矣乖氣之能致異也魯之宣公以篡得國故屈已以事齊今又勞民以會齊而伐萊天何義乎公旣告至而國內大旱庸非嗟怨之氣上感于天而致之乎春秋書伐書至於上以著宣公之罪繼書大旱於下以見天道之應不可誣也嘗謂善惡之事作

于下而災祥之應見于上此天人相與之至理也是故僖公以務農重穀爲事而三時之不雨不足以爲其害莊公以峻宇雕墻爲務而一時之不雨卽可以爲之憂天之於人各以類應其可忽哉今宣公之得國旣獲罪于天矣况於卽位以來煩其兵役瀆其交際虛內事外而不恤其民乎則天降之災宜矣齊爲不道狡焉思啓封疆故爲伐萊之舉其所以召兵於魯者恃其有援立之私恩也宣自會于平州以後奴役于齊非一日矣今又動魯國之衆往爲之役以伐無罪之萊外結釁于遠人而賈怨于百姓則是行也寧不危哉幸而得歸反行飲至以告于先君之廟甚哉其怙惡也軍旅之後必

有凶年蓋其愁歎之聲怨憤之氣上徹于天而戾氣爲之應乎是故伐萊方至旱暵已作旱而曰大必至於滌滌山川而不可沮非真僖文不雨之比也春秋以大旱書者抑旱而不雩耶是故憂國恤民之心也雩而不雨耶是見棄于天矣宣公造惡不悛而流毒于其國若是哉聖人比而書之所以哀魯國之民也雖然宣之虐用其民不特此也伐莒取向伐邾取繹改助法而用稅非一事矣天之示變亦不特此也螽之見經者三饑之見經者二至於大水喙生亦非一端矣春秋備書于經然則爲君而不仁不義者亦可警矣故曰天災流行必不於有道之國豈不信哉

鄭伐許鄭伯伐許

諸侯之陵虐小國春秋狄之于前而爵之于後皆以著其惡也夫春秋之法有加貶而後見其罪者有直書而罪自見者惟明乎屬詞比事之意斯得之矣鄭人爲許之小弱也每肆暴以伐之皆罪矣故我成公之三年書鄭伐許以其一歲而再動干戈爲惡已甚故稱國以狄之所謂加貶以見其罪者也及其明年襄卒而悼立矣喪未踰年而復伐許其惡非不甚也然自鄭伯而不貶所謂直書而罪自見經之書爵又見其釋服從戎有忘親之罪焉由此觀之春秋之法可知矣嗚呼王澤竭伯功淺小國之迫于大國春秋深傷之也許以太

岳之胤密邇于鄭鄭莊怙其詐力託爲鬼神不逞之詞入其國而披其地其所以不遂殄其宗祀者東遷之初尚以滅國爲重事故未敢蒙首惡之名然而竄逐其君置許叔于東偏而公孫獲處其西制其死生之命雖有存許之名亦何異於滅乎其後許叔因亂竊入未幾而齊伯興故得保其遺祀以俟他日鄭人蓋以許爲俘邑久矣特畏大國而未得逞其志耳以義言之許者先王所封之國鄭安得而虐之哉今鄭襄既背中國而事楚遂藉強彘之勢肆虎狼之心一歲之間再加兵於許國不思己之見陵於晉楚者亦惟國小而弱之故可不自反而以是施於叢爾之男邦乎是與彘狄之所行無

以異矣春秋秋之所以誅其不仁之心也襄公既沒悼公所
宜改惡從善以自新也奈何父喪甫葬遂以吉禮從金革之
事以肆其毒于許夫許之與鄭非有不共戴天之讐何至伐
之若是亟哉忘喪非禮陵弱不仁于大國之怒不智卒之交
訟楚庭以中國之君而聽于葵狄之大夫然則鄭伯之自伐
亦甚矣春秋於襄之伐許雖書之于公子去疾帥師伐許之
後而其惡未著故必貶之而後見若夫悼之伐許則上書葬
鄭襄公而繼之以鄭伯伐許則其罪已明不必貶矣故曰惟
明于屬詞比事之義斯得之矣大抵春秋之法既貶則多從
同是故晉之伐鮮虞也既於昭公之十二年秋之矣至于十

有五年荀吳之伐則直書之蓋與鄭伐許鄭伯伐許之書法
同矣雖然許獨無可議者乎苟能修德行仁以保其國何畏
乎一鄭而乃恃楚以爲安他日楚有亡郢之禍而鄭遂有滅
許之師而華葵白羽容城之遷俱無益焉嗚呼觀遠臣以其
所主棄中華之禮義而附葵以爲安夫何社稷之能守哉

陳侯使袁僑如會陳人圍頓陳侯逃歸

二國背葵以卽夏乃不量力而陵小國又不守義而叛伯主
此春秋之所惜也夫爲國以禮其不可慎而輕舉哉陳之成
公背楚從晉而使袁僑聽命于鷄澤之會可謂之所嚮矣至
于哀公乃興圍頓之師以挑楚人之怒及夫于鄆有會諸侯

方急于陳而又效匹夫之事脫身以逃則其舉不中禮甚矣是故書陳侯使袁僑如會見其背楚而從晉也陳人圍頓見其無故而怒楚也陳侯逃歸則又背晉而從楚矣五歲之間一來一往君子蓋有取於成而深不滿於哀焉是故袁僑如會而稱陳侯之使致其志也圍頓而稱人貶也逃義曰逃逃者匹夫之事也由此觀之予奪見矣嗚呼陳以有虞之裔列在三恪雖其國邇于楚然春秋之初楚患已及蔡鄭猶未至于陳也齊桓之伯陳無事于四隣故獨倚齊以爲安桓公卽世穆公首生厲階以倡于齊之軟則延盜入室職陳之由由是而取焦爨由是而圍宛丘則陳實自取之耳尚頓晉文之

與而踐土如會得以自拔于蠻彝之汙不幸而有靈公之禍中國無伯而陳遂專屬於楚亦可哀已今也晉悼復文襄之業實中國之大幸矣陳侯厭楚之暴而幡然改轍雖不能躬來聽命於壇坫之間而袁僑之使亦足見其向華之實以二十餘年服楚之國一旦不召而來春秋能不與其出幽谷而遷喬木乎彼楚也怒陳背已則未敢聲兵來伐而始使頓問陳者何耶侵欲之暴其曲在已故未有詞以加陳也爲陳計者修明德政堅事伯主而睦四隣叢爾之頓亦何以伺其隙哉不知自反而肆其兵威以圍頓不思頓小于陳而陳小于楚頓固非我敵也而我豈楚敵哉昔在穆公嘗以頓故受得

臣之圍矣今而圍頓無乃履其覆轍乎遂使楚人得以有詞于我而陳國從此不遑寧處伐而繼之以圍陳雖噬臍亦知無及然當是時晉君方明諸侯聽命始之以戍而繼之以救未嘗頃刻而忘陳也今又合諸侯于鄆亦惟陳故之以苟能完守以老楚仗信以待晉猶可爲也奈何以千乘之君效匹夫之舉背先君之成德棄儀衛而逃奔是下喬木而入幽谷其父析薪其子弗克荷負春秋至是不得而不責之矣蓋嘗論之春秋之時陳與蔡鄭皆困於楚之國也而其受患之故多在於不量力以召傷是故鄭之見伐始于侵蔡而蔡之被圍由于滅沈不思小國之見陵于我亦猶我之見陵于楚也

惟不能推己及人以至于此是故陳人圍頓獨加貶焉蓋圍國非將界師少所能辦而書人焉其貶明矣雖然晉之與楚爭者陳與鄭也自于鄆以後而陳遂終于從楚悼公之志蓋自以得鄭爲足矣晉人曰有陳非吾事也無之而後可魯人曰陳不服於楚必亡論而至此則陳之不能自拔爲可矜而不能拔陳於楚則亦伯者之罪也

城費叔弓帥師圍費

大夫役民以疆私家而無以制陪臣之橫可見其出乎爾者之反乎爾也甚矣上行下效之捷于影響也季孫宿爲政于魯無故役民以城費不過欲疆其私邑以弱公室也豈意至

于意如而南蒯據之以叛叔弓帥師圍之有如敵國其效豈不深切著明矣乎君子曰所惡于下毋以事上所惡于上毋以使下觀季孫之所爲亦可爲不能事君者之戒矣夫先王之制大都不過三國之一中五之一小九之一所以示強幹弱枝之道而弭亂之所由生也昔者季友受費于僖公至是九十年矣未嘗有疆場之虞也無故役民以城之且當農事方殷之月何其急耶是季孫宿之欲斷喪公室惟恐其弗及也是故乘叔仲之媚已而興版築之功君且不顧於民何有哉一旦百雉之城溥彼東土而龜蒙之景如兩國焉由是而三分公室有其一由是而四分公室有其二惟其所欲而爲

之夫孰得而制之哉而不思南氏之世爲費宰亦猶季氏之世爲魯卿也彼南蒯之欲出季孫亦猶季孫之欲僭其君也叔弓以國卿動魯國之衆環而攻之則向日之溝池雉堞反爲他人之守亦獨何哉出乎己者之反乎己不可誣也春秋書城費于襄公之時而又書圍費于昭公之世所謂屬詞比事原始可以知其終矣故曰祿之去公室五世矣政逮于大夫四世矣故夫三桓之子孫微矣夫三桓實分公室而子孫以微何耶下陵上替雖令不從此其效也或曰春秋不登叛人南蒯以費叛而不正其罪何也曰謂春秋法不書內叛但書圍則叛可知此胡氏之說其或有未盡歟按左氏南蒯請

子仲吾出季氏而歸其邑于公子更其位我以費爲公臣則
蒯之叛叛季氏也非叛公也季氏無君之人安得以叛名蒯
春秋亦安得以叛討夫謀去意如者哉不然公山弗狃以費
畔召孔子而子欲往何耶

公至自晉晉侯使士匄來聘杞伯來朝邾子來朝築郎

囿

交情睦于外而逸樂肆于內觀春秋比事之書可以知望國
之所以衰矣夫國家閒暇乃修明政刑之時而勞民以自奉
則豈君人之道哉成公之末年至自朝晉而晉侯即使士匄
來聘大國睦矣旣而杞伯邾子相繼來朝小國睦矣四隣和

睦國家無故不於此時立政立事以新其國乃役民以築鹿
囿夫何爲哉君子以是知成公之終於不振而已矣嘗觀成
公在位十有八年之間國內多故甚矣方其卽位之未幾也
赤棘有盟而東雩于齊戰韓幸勝而南辱于楚北年朝晉而
汶陽之田終失于韓穿之言僕僕從役而沙隨之會又中於
僑如之譖會葬而見止來聘而及盟其所以困心衡慮者亦
云至矣何獨無憤悱自強之心乎幸而晉悼新立矯厲公之
虐政復文襄之故業推親親之心以仁我是以公之如晉至
不暖席而士匄之聘踵及魯庭以伯主之尊報禮於魯惟恐
或後晉之待魯非復昔日比矣於是杞伯邾子之朝項領相

望自吳伐邾之歲曹伯來朝之後諸侯不至魯庭者十年謂魯之不見重于大國也今而驟來庸非爲晉重魯之故歟大國來聘而小國來朝公之困辱至此可少殺乎則當居安思危鑒已往之不逮圖將來之日新明德修政懷保小民維其時矣不此之圖而槃樂傲怠如恐不及當農事之方殷役丘民以築囿囿曰鹿囿者養鹿之所也虞山藪之利以奉耳目之娛而不知國政已落三家之手雖有臺池苑囿其能獨樂之哉春秋比而書之義自見矣厥後昭公之卽位也魯亦未有事也七年而公如楚八年而叔弓如晉九年而仲孫糺如齊大國睦矣而郎囿築焉無乃效成公之尤乎詩曰且以喜

樂且以永日宛其死矣他人入室築囿未幾而周公之魯爲季孫之魯矣他日定公亦築蛇淵之囿于墮三都之日卒使聖人去魯而一變至道之國終分崩離析而不能守叔孫有言曰無囿猶可無民何爲而魯之諸君不悟也哀哉

蔡侯鄭伯會于鄧公及戎盟于唐公至自唐

德不修而懼外患者爲可鄙身不正而結外交者爲可危夫天下莫大於理莫強於義也曾何會盟之足恃哉蔡鄭與鄧爲楚疆而懼則相與爲會于鄧而不自省其德之不修也不亦鄙乎魯之桓公篡其兄而立則往與戎盟于唐而不自念其身之不正也不亦危乎是故于鄧之會特書于經而于唐

之盟謹書其至聖人之意見矣嗚呼方叔元老克壯其猶吾
聞蠻荆之來威矣未聞私相會聚而懼之也元戎十乘以先
啓行吾聞戎狄之是膺矣未聞刑牲歃血以要之也而况於
時會發禁行人掌其事非列國之所得專司盟之法太史藏
其約非諸侯之所宜用也哉今也蔡鄭之爲會于鄧不過謂
我之封境密邇荆蠻而輦路縑縷之衆實蕃有徒惟我有邦
所當協比以爲輔車相依之勢自常情觀之其策未爲失也
君子則曰惟德可以自強苟有令政則湯以七十里無敵於
天下矣何不師之而安其所以危乎地醜德齊莫能相尚而
徒以會聚爲能事陋矣哉三國之所爲也春秋直書其事雖

無貶詞而鄙之之意自見于言外矣若夫魯桓之及戎盟于
唐得無謂已得國本以不義而狼子野心之種實處東郊我
位新定所當修睦以市繼好息民之譽自常人言之以爲不
足責也君子則曰彘狄之有君不如諸夏之亡也彼諸侯之
甘心同惡者無可望矣安知禍之不在此乎要言旣畢反行
飲至以告先君之廟幸矣哉桓公之此行也春秋先書及以
志其欲在魯終書至以志其幸而得歸而危之之意見矣觀
之諸侯已不能自強矣觀之孳國又有甚焉則彘夏盛衰之
勢判矣嗚呼濫觴不塞必致于滔天之憂履霜不謹無惑乎
堅冰之至他日盟于齊而戰于泓次厥貉而盟辰陵甚而至

於問鼎於周室則楚之勢愈盛向使蔡鄭之徒能思所以自強吾固知其不在此也異日侵濟西而爲魯患阻燕貢而逐曹君極而至于敗劉康公之師則戎之抗莫遏向使中國無間可乘吾又知其未至此也詩曰枝葉未有害本實先撥憂國者盍亦以禮義爲尚不然何華彘之足辨哉

鄭人侵宋宋人齊人衛人伐鄭荆伐鄭會齊侯宋公

云同盟于幽

二國背好以啓華彘之交爭外彘猾夏而速諸侯之從伯此世道之所以變也夫彘狄之陵中國豈無其故而列國之成爲伯亦豈無其由哉故我莊公之時鄭人棄二鄆之好而間

齊以侵宋於是諸侯有伐鄭之舉未幾而荆亦伐鄭則華彘之爭鄭非由鄭人侵宋以啓之歟荆旣伐鄭而後于幽之盟出於諸侯之所同欲而齊伯成矣然則來齊楚之爭者鄭也而成齊桓之伯者荆也比事以觀豈不信哉師人有言國必自伐而後人伐之也其鄭之謂乎又曰爲淵驅魚者獺也爲叢驅雀者鷗也其楚之謂乎我莊公之十年齊宋實始爲郎之次其年荆亦敗蔡于莘儼然有與君並與之勢矣越四年而荆入蔡於是乎有二鄆之會諸侯之心蓋已凜凜畏楚而思倚齊以爲安矣鄭何爲者玉帛之好方同而干戈之念又起間諸侯之有事于郟而侵宋潛師以掠人之境何名也是

詩意什文集
時宋方睦于齊師而加宋齊必救之鄭豈不知此哉而侵宋
焉是謂自作孽以動天下之兵也未幾而諸侯之師至矣以
一旅之侵易三國之伐鄭之爲謀疎矣不思旣睽于齊而又
取輕于楚遂使荆尸乘廣之卒鳴鐘擊鼓公然問其緩告之
罪而滎陽京櫟之間自是多故向使鄭人能守二鄆之好則
唇齒之勢方固楚安得而輕犯之哉故曰貳國背好而啓華
彘之交爭也若夫齊之圖伯固未能卒有諸侯也北杏之會
宋人旋叛二鄆之役鄭又貳心屢會而不敢爲盟知人心未
可以強一也及夫荆患至鄭則天下諸侯皆有無厭及我之
慮矣於是大國若宋衛小國若滑滕遠國若陳許望國若魯

無不皆來而鄭伯亦不敢不親至矣於是相與爲盟且謂之
同而無不從齊之國矣向使楚患未至于鄭則桓公之伯烏
得而遽成哉故曰外彘猾夏以速諸侯之從伯也春秋書曰
鄭人侵宋責之也三國伐鄭而書人將界師少也荆伐鄭狄
之也盟于幽而書同同欲也諸侯書爵與之也不書我公諱
失信也聖人予奪之意見矣嗚呼以列國而主天下之政豈
春秋之所欲哉不得已也則世道之變可勝言哉雖然吾於
齊桓伐鄭之事不能無憾也鄭突以篡而有國當討也使桓
公能請于王而正其罪不亦美乎而公之志止于得鄭而已
耳伐鄭以討其侵宋執鄭詹以問其不朝於天下之大義無

與也論者謂召陵之役不問楚之僭王而問包茅之不入蓋伯者之苟且大抵類此不然九合諸侯一匡天下其功盛矣何仲尼之門羞稱之哉

齊仲孫來齊高子來盟

外臣之來望國其受命同而所行異春秋因其得失而予奪之也夫以道事君者忠之大也仲孫高子皆齊大夫仲孫之來名爲省難高子之來名曰謀魯其受命而來也皆非有定難安危一定之辭也春秋略其君臣之常詞而不稱使無以異也然仲孫不勸其君急于討賊而俟其自斃高子至則平魯難而定僖公使魯國賴之以安是仲孫不能匡君以義而

高子則能權而合宜故春秋一則直書曰來而不言其故一則美而稱子且曰來盟則三子之得失可見矣仲尼曰君使臣以禮臣事君以忠謂之以禮則不可爲私也謂之以忠則不以趨走承順爲恭而以責難陳善爲敬也然則仲孫高子之得失豈不昭昭矣乎夫齊之與魯親則甥舅且隣國也魯國有難齊其可以坐視之乎而况於盟幽之役旣以伯主自任昭大神要言焉於是乎授之諸侯將何爲耶天禍魯國莊公卽世而嗣子弗終無所歸咎魯之臣子方將有討而力不足則大國是望而已矣桓公不修乃職而有乘亂取國之心乃使仲孫來魯陽以省難爲名而陰行窺覘之計伯主之義

豈若是哉仲孫之言曰不去慶父魯難未已則既知罪人之
所在矣則勸其君共行天討不可後也乃曰難不已將自斃
固將坐而待之乎雖有務寧魯難而親之之言不足以蓋其
幸災養患之罪矣卒使臣姦稔惡無所忌憚而武闢之禍再
作向使仲孫能勸桓公早爲之所豈至此耶春秋不言其故
而止曰來則其來之無名可知矣閔公無祿魯國無君桓公
又使高子將南陽之甲至魯而謀其國其所以命高子者想
不異於仲孫矣而高子則不然君之命我雖無一定之言而
我之事君豈可不引之以當道哉與其取魯而失天下之心
孰若安魯以昭吾君之令德哉於是制其闔外之命魯未有

君我是以定公子申之位魯難未已我是以有鹿門吏門之
城魯民未安我是以和其不協而爲之盟使周公之社稷賴
以不墜而齊侯獲存亡繼絕之名於天下嗚呼事君若高子
真所謂大臣哉若仲孫者可謂具臣而已矣故春秋特褒之
而稱子且曰來盟見其權在高子而高子又能行權而合乎
善非若仲孫之比矣或曰仲孫以省難來安知其陰行窺覘
之計乎曰觀桓公之問曰魯可取乎則知之矣曰然則仲孫
何以稱字而不貶乎曰仲孫雖不能勸君以討賊而亦未嘗
納君於惡也故曰君其待之非也而曰君其務寧魯難而親
之則是矣故以仲孫方之高子則不足若加貶焉則有勸桓

公乘時以取魯者又將何以罪之哉此又輕重之權衡也故曰春秋非聖人莫能修之夫豈可以苟言哉

晉人執虞公

諸侯徇利以失國乃其自取之也夫有國家而以利徇人未有不失之矣其虞公之謂乎虞公貪璧馬之賂而從晉以滅虢虢亡而虞亦隨之春秋書曰晉人執虞公言以衆人執獨夫也夫以千乘之國爵爲上公而晉人執之如一夫然非虞公自取之乎觀聖人之所書可以爲貪利者之戒矣夫虞太王之昭也晉於是乎滅虞矣則不言滅而止言晉人執虞公何耶蓋滅者亡國之善詞上下之同力也上無明王下無方

伯諸侯而有壤地褊小困於強暴力不足而失其國非其有以致之則書滅以見滅之者之罪如談遂弦黃之類是也若夫虞公則異於是矣以堂堂上公之尊君百里之地夫孰得而犯之哉今也重貨財而輕兄弟信邪說而違忠言璧馬旣入而滅虢之師遂起不思下陽滅而虢不能爲虢虢滅而虞不能以爲虞輔車相依唇亡齒寒宮之竒言之矣而不聽是愛社稷不如垂棘之璧而視同姓之親不如屈產之乘也不仁不智無禮無義非獨夫而何哉以千乘之君而身爲獨夫其亡也非不幸矣春秋不書晉人滅虞而曰晉人執虞公若曰虞地之縕於晉久矣虞公之死命制于晉而已矣故左氏

曰罪虞且言易也。穀梁曰其曰公者猶下執之之詞也。嗚呼利之能亡人國若是哉。人亦有言家必自毀而後人毀之。國必自伐而後人伐之。其如虞公矣。或曰晉之於虞同姓也。衛侯燬滅邢而生名之虞。固有罪而晉得從末滅。何耶。曰滅人之國其罪易見而貪利以失國其罪難明。下陽邑也。而以虞晉滅之爲文。晉之罪已見矣。今又執虞公焉。虞公天子之上公而晉人擅執之。是無王也。而得爲無罪乎。春秋不以梁亡之法書之。則亦不以怨晉矣。若夫滅同姓之惡。復何待於貶耶。

莒人伐我東鄙圍台。季孫宿帥師救台。遂入郟。

伐國而圍人之邑與救患而入人之邑者皆王法之所不容也。夫兵春秋之所惡。至于乘勢以爲利。尤有所不當爲者矣。我襄公之十有二年。莒人伐我東鄙而圍台。書伐書圍是罪之在莒也。季孫宿受命以救台。不受命而遂入郟。書救而遂入是罪之在季孫矣。莒固不義而魯亦豈爲義哉。春秋比而書之所以著二國阻兵修怨之罪也。凡書伐者皆惡其擅兵以爲暴也。伐而圍人之邑則又甚矣。凡書救者皆善其恤患而解紛也。救而遂入人邑則救不足言而入爲罪矣。是故蕞爾莒國敢伐我而圍邑。患自外至者也。君子固爲魯憂之。季氏強臣因救邑而生事。患自內作者也。魯國之憂至是始大。

矣嗚呼龍旂承祀奄有龜蒙魯周公之裔胄春秋之時惟齊倚其舅甥之故而轉爲仇敵其他若宋若衛若晉若秦皆不敢以一矢相向者畏周公故也今以僻陋在彙之莒乃敢執干戈與魯周旋庸非魯人自取之乎于鄆之役季友敗其師而俘其卿莒人不敢報也僖公屈于乘之尊嫁女于其大夫而自主之又降班失列下與之盟封境之間雖得無事而辱國亦甚矣宣公以不正之君貪功徇利以啓爭端莒猶未敢致報畏魯之有齊援也襄公不務德政而屬鄆以爲私卒致莒人滅鄆而侏儒有狐給之敗由是魯之不能爲人所料而莒始敢稱兵伐我矣至于今而圍台乃莒人伐我之二役也

聞諸侯之有事背盟好而興戈矛今又伐我而圍其邑莒之罪不可勝誅矣季孫受命以救台台者我之封邑受諸先王有民人焉不可以不救也師至而莒圍解振旅以歸復命可矣乃乘時而遂入鄆無乃怒蹊田而奪之牛乎尤而效之其罪與莒同矣而擅權生事不有其君非細故也其患豈直伐我東鄙而已哉春秋書莒人伐我東鄙圍台所以著莒人之罪繼書季孫宿帥師救台遂入鄆帥師救台可也而遂入鄆不可也遂者專事之詞入者不順之意則季孫之罪不可逃矣故嘗論之莒魯之爭每不利於公而利於季孫厥後乘亂取鄆者季孫也而叔孫當其討伐莒而取鄆者又季孫也而

昭公受其辱其事蓋權輿于救台入鄆之舉矣故曰莒患不足爲憂也而大夫之患深可爲魯憂也詎不信哉

衛人立晉

爲臣而擅置其君爲子而專有其國則皆得罪於王法矣夫春秋爲正名分而作也衛有州吁之亂賊旣討矣其國人不能請于天王而立晉是擅置其君也晉雖諸侯之子無王命而遂立焉是專有其國也春秋書曰衛人立晉則衛人與晉之罪皆無所逃矣古者諸侯繼世襲封則內必有所承爵位土田受之天子則上必有所稟必承國於先君者所以重父子之親必稟命於天子者所以正君臣之義天下之大倫於是

乎在而可以私亂之乎衛州吁以嬖人之子弑其君而自立諸侯連兵欲奪其位而衛人不以爲君凡經八月而殺之于濮謂衛國之無人焉不可也奈何知其一而不知其二乎此聖人之所深惜而特起衛人立晉之文也歟吾嘗觀衛人之殺州吁而知春秋之初人心之天理猶明也及觀衛人之立晉而傷春秋之時人心天理之壞亦自此始也何也擊鼓其鏜踴躍用兵介先君之寵握百里之權弑其君而虐用其民有宋魯陳蔡以爲之黨其勢未易取也然而敢卽圖之使一往而陳人遂執以請蒞以一告老之大夫主其謀而國人無不從諸侯無敢沮非人心天理之猶明而若是夫奈之何討

賊之後遽爾相率自置其君而不使一介行李告于天子視周室如無人焉則不顧先王之典而陷其君於無王之罪矣彼晉者宣公也縱不足責而石子賢人也亦不念水木之本源乎無他徃於見聞之習而遂以爲常也賢者而若是矣人心天理之壞可勝救乎觀衛人立晉之文繼于衛人殺州吁于濮之後其爲深惜之可知矣是故衛人書立立者不宜立也所以著擅其君之罪也於晉絕其公子言其內無所承也所以明專有其國之非也晉也旣立卒於不令以亂衛國大抵不正其始者必不能善其終蓋亦必然之理矣或曰春秋書立君者二此年衛人立晉及昭二十三年尹氏立王子

朝是也彼則指其立之之人而此則言衛人何也蓋立子朝者尹氏之私意也朝不當立而獨尹氏立之也晉雖不當專有其國而實當立故衛人之立晉特不請于王爲可罪而非若尹氏之私于子朝也此又輕重之權衡也吁聖人之筆嚴矣哉

三月癸酉大雨震電庚辰大雨雪

春秋紀陰陽之失節所以示人君不可忽天道也夫春秋常事不書惟異而後書之震電雨雪常有之物而以爲異何耶蓋周之三月乃夏時之正月陽氣未大發也而大雨震電陽失節矣震電旣發則雨雪不當復降越八日而又大雨雪是

陽禛而陰復肆也陰陽之交失若是安得不以爲異乎天人
一理有感則有其應觀春秋之所書而隱公之失政可知矣
愚嘗求之洪範庶徵之論矣君人者所以建皇極而納民于
福者也是故雨暘燠寒風之若否由之而應於是乎有恒寒
恒燠之罰焉人君知之則遇災而懼雖有其象而無其應不
然則應復爲感而災咎之來必矣是故震電者陽精之發而
雨雪者陰氣之凝震電則發于燠雨雪則凝于寒不可並行
也隱公卽位九年于茲不聞令政而多涼德以諸侯而不事
天子以國君而不撫庶民軍旅數興政權下替君道之失久
矣今以建寅之月未當啓蟄之時而大雨震電陽氣之運已

過于早矣雷電旣發于癸酉之辰而雨雪復作于庚辰之日
陽不順令而動非其時故不能勝陰之兆見矣故震電而曰
大雨震電雨雪而又曰大雨雪則皆非小變矣爲隱公者盍
亦反躬而自省矣德不修歟政不舉歟讒邪之未去歟善人
之弗用歟抑小民之失其所而祭祀之不共歟何上天降鑒
之若是也我其夙夜畏天之威而思所以自新庶其免於戾
矣公則藐乎無所警也方且伐宋取邑會鄭入許揚揚然自
以爲功而鍾巫之難作矣春秋所書雖然不言其應而事應
之符昭然不昧故曰非深明夫天人之理者不可以言春秋
也抑嘗攷之于經凡書雨雪者三而兩在冬若以夏時言之

則雨雪冬所當有春秋法不當書而况二百四十二年之間
豈止兩雨雪耶故知春秋之以周正紀事而書冬之爲建酉
戌亥之月無疑也此夏時之正月則以震電雨雪兼作爲異
且又大而過常則皆爲不時矣嗚呼讀春秋者不以全經貫
之而欲因一句以求義安能得聖人之微意哉

公子結媵陳人之婦于鄆遂及齊侯宋公盟

大夫輕身以親淺事而專命以抗公侯春秋書之所以責其
重以失已而又輕以失人也夫禮莫大於正名分過與不及
皆罪矣而况於一出而兩失之乎今公子結以國卿之尊而
下媵陳人之婦是以所重臨乎禮之輕既失已矣既而以大

夫之卑而專事以及齊侯宋公盟是以所輕干乎禮之重又
失人焉然則結之不知禮也甚矣春秋能不深惡之哉吾聞
之易曰君子以裒多益寡稱物平施故以微者而視大夫猶
以大夫而視公侯也其體之不敌猶堂陛之有級截然不可
犯矣今公子結以諸侯之子爲當國之卿固將任出謀發慮
之寄以匡社稷庇民人也今乃縱一己之私情親媵婦之淺
事是謂以尊臨卑而亂上下之等威矣至於齊侯者太師之
胤東州之方伯也宋公者先代之後天子之上公也夫豈列
國大夫所可敵哉乃不自揣而敢上要之盟無乃以卑抗尊
而紊君臣之名分乎故以公子而媵微者之婦是以冠而薦

履也以大夫而盟齊宋之君則舉足而加首矣不特此也人
臣非君命不越境郵衛地也以私事而出不可也大夫無遂
事盟者有國之大權不稟于君而專之不可也然則此行也
豈特失己失人而已哉又有不臣之罪矣春秋據事而直書
之結之罪其可逃乎是故牲盤之好方講于秋至冬而三國
之師至于西鄙故曰國必自伐而後人伐之其公子結之謂
乎雖然魯則失矣齊亦未爲得也彼結之求盟其從其否固
在我也何至以二國之君而輒從其所欲哉旣盟而後伐之
非矣厥後季孫行父會齊侯于陽穀求盟而齊侯弗及之盟
夫以商人之不義且能卻行父之請而况于堂堂伯主之尊

乎嗚呼結不足責也吾獨深爲齊桓惜之

公會齊侯

云

云

盟于牡丘宋人伐曹楚人敗齊于婁林

伯謀不協而與國貳此外彘之所以得肆其志也甚矣齊桓
之伯有始而無終也牡丘之役將以救徐而先爲盟固可見
其不協矣誓言方新而宋人有伐曹之舉大功未立而自攜
貳將何以禦外患耶遂使楚人得志而敗徐于婁林中國之
勢於是乎衰矣由此觀之非桓公不能敦不息之誠而至於
斯歟常謂齊內以治外者善謀也慎終以承始者善道也故
外彘之進退未嘗不視諸華之彊弱而諸侯之向背又豈不
由伯心之思數哉是故桓公之始伯也鄭侵宋則合宋衛以

致討荆伐鄭則率魯宋而往救分災討貳諸侯無闕故能壯
中國之勢以服四彘召陵之功蔚爲五伯之盛誠可嘉也使
其嘗存是心不亦善乎奈何葵丘旣會震矜遂生由是楚伐
黃而不救以次陘椅角之助反貽隊命亡氏之悲則桓公之
不足以宗主諸侯人知之矣不然以密邇山東之徐楚人何
敢踰越險阻以伐之耶今楚而敢伐徐則以不救黃而覘桓
公之不能矣公能於此而振旅焉猶可及也奈何八國諸侯
萃于牡丘則不鼓行直指淮泗之間以拯徐人於焚溺而方
且刑牲歃血以詔鬼神諸侯君實有之何辱盟焉則佞謀之
不協可知矣使敵人得以恃度其情而淹留不退誰之咎耶

大夫之救不聞有功而伐厲之師徒爲黷武未幾而無役不
從之宋遂敢致怨于伐厲從齊之曹雖曰弱曹不顧齊矣不
知牡丘之盟何爲耶外憂未弭內志已睽俾好惡同之之國
翦爲仇讐而不能禁兄弟鬩于墻外禦其侮今不然矣中國
之虛實在楚人目中矣於是荆尸乘廣之旅蠡合豕突以敗
徐于婁林則向日爲齊取舒之人今亦無以庇其民矣使三
十餘年之功業一旦掃地豈不哀哉嘗因是而論之齊桓之
伯業有係於宋不小也方其始也宋公推戴以爲盟主而伯
業以成及其終也宋人背之以伐曹遂卒無以制楚昔者湯
以七十里文王以百里曷嘗倚人以爲勢哉譬之於水有本

者其出無窮若夫蹄涔溝澮得雨而盈霽則涸矣嗚呼此伯者之功烈所以如彼其卑而君子不願爲之也夫

齊侯襲莒

大國用兵以掩人之不備春秋特書以著其罪也夫兵以禦暴非所以爲暴也而况以詭詐行之者乎齊爲不道乘莒人之不備而潛師以襲之不仁甚矣春秋特起襲莒之文而專目齊侯則其包藏禍心之惡何所追哉先王用三驅而不掩羣君子釣而不綱弋不射宿待物且爾而况於人乎凡春秋書用兵皆在所惡然亦有聲罪伐人而駐兵不戰以服之者矣未聞有以襲書也彼小國恃大國之安靖已無故而加之

兵已有陵弱犯寡之罪况以陰謀闕計出其不意而掩取之乎此春秋之所必誅而不赦者也齊莊背澶淵之會盟而助叛臣以伐盟主不義甚矣入孟門取朝歌無損於晉也動而無所以生悖心於是襲莒之念興焉銜枚臥鼓出莒人之不意自謂一鼓可以得莒矣而不虞其謀之不遂也且于之門傷股而退蒲侯之遇杞梁授首亦何益哉人亦有言抑君似鼠晝伏而夜動其齊侯光之謂矣春秋二百四十二年之編此爲特筆蓋用兵之中其罪爲尤甚者也而齊獨有焉他日宋皇瑗帥師取鄭師于雍丘而鄭罕達亦帥師取宋師于嵒潛蹤密跡伺人之間以相傾覆流而至于戰國殘民以逞若

艾草菅然始作俑者其無後乎今年未能得志明年再興伐
莒之師構怨未已而不知禍盈惡積變起蕭牆未幾何時崔
氏之難作矣故曰阻兵無衆安忍無親衆叛親離難以濟矣
嗚呼若齊莊公者尚誰懟哉抑嘗攻之于經凡特筆以著其
暴者多在于齊故在襄公則有遷紀邢鄆部之舉在桓公則
有降鄆遷陽之文不特此也春秋未嘗書滅國也而滅國亦
自齊始發揚蹈厲之志以成從簡尚功之俗蓋其流風之未
泯歟

太師誠意伯劉文成公集卷之十九終

太師誠意伯劉文成公集卷之二十

東嘉裔孫歲貢生標孤嶼元奇重梓

春秋明經

築臺于郎築臺于薛築臺于秦冬不雨

力役荐興而民困故天降之異爲可憂夫固國莫大於保民
而保民莫切於備患也魯之莊公不知務本而節用故卽位
之三十二年春而築臺于郎矣至夏而再築臺于薛其秋又
築臺于秦三時而築三臺是謂妄興力役無故以勞民也其
冬而有不雨之異夫民力困矣而重之以天災寧不深可憂
乎是故一歲築臺而至于三則莊公之虐其民者可見一時

不雨而書則聖人之憂民者可知矣吾嘗觀于莊公之經矣公之二十八年一興築郿之役而遂至于大無麥禾則其不能務本節用而無豫災之備可知矣築郿之歲未嘗聞有水旱蝗螟之災也而至于倉廩皆竭况于連築三臺而重以不雨之變乎嗚呼此春秋爲之深憂而謹書之也古者天子有靈臺以候天地諸侯有時臺以候四時夫豈以爲觀游之所哉今莊公去國築臺于遠則是爲耳目之娛而勞民矣勞民以自樂使百姓見其車馬羽旄皆疾首蹙頰而相告其何以爲國乎故當卒歲于耜之時旣已築臺于郎矣至舉趾條桑之月又築臺于薛焉侈心一肆遂不可遏又役亨葵及菽之

民而築臺于秦何至若是數數而不憚煩也哉財盡則怨力盡則懟怨懟之氣積于下而陰陽之氣沴于上是以不雨之應遂見于二年之冬嗚呼天之愛民甚矣豈使一人肆于民上而淫從其欲哉今茲之警良可懼矣是故一時不雨非大災也春秋猶謹書焉所以寓憂民之深意也抑嘗論之魯於春秋以周公之故而爲天下諸侯之宗莊公值齊桓之伯宴安無事苟能立政立事以保乂其民周公之業可復振也今也不然及此時盤樂怠傲不亦深可惜哉三築臺而不雨矣明年之春又城小穀是以民力爲不足惜而惟其所欲爲矣身雖終於正寢而嗣子卒斃於亂臣之手其國幾亡嗚呼使

天假之年吾恐莊公之憂不在其子孫而在其身矣

齊侯衛侯鄭伯來戰于郎齊人衛人鄭人盟于惡曹

諸侯連兵以構怨又結言以固黨春秋所以直書于前而貶之於後也夫征伐會盟已非諸侯之所得爲而况以不道行之者乎鄭憾魯之後已而挾齊衛之君爲郎之戰是謂連兵以構怨非義甚矣旣戰而爲惡曹之盟又結言以固黨夫何義乎春秋存其爵於戰所以見其實貶其爵於盟所以正其罪聖人之筆削嚴矣哉嗚呼九伐之法職在司馬王者所以討不庭盟載之法掌於司盟聖人所以待衰世有天子在夫豈諸侯所得而私用哉彼齊者太師之胤衛者康叔之後而

鄭者宣王之懿親也我周東遷子孫日失其序惟是一二伯父叔舅所當戮力以爲藩屏豈如弁髦而因以倣之今也木念先王先公而私相樹黨以侵敗王略使宗周之界日益滋甚其何罪大焉嗚呼此春秋之所必誅而不以聽也且郎之戰何爲耶魯桓天下之大惡人人所得而討也彼鄭伯旣首盟于越以定其位齊侯則繼會于稷以濟其姦衛亦坐視而不問也則皆與之爲徒矣今乃以周班後鄭之故合三國之君親將戎卒壓周公之封境以快心於一戰尚爲知類也夫是故春秋列序三國之爵而曰來戰于郎若曰三國之志爲此戰也則其動衆無名殘民不道之罪可見矣鄭伯主兵而

先齊者所以治惡黨猶衛州吁主兵而先宋也惡曹之盟又何爲耶方其來戰也旣曰同心以從事于兵革矣復何嫌隙而結盟哉蓋其合也不以義則其中不無疑矣於是刑牲歃血質之以鬼神矢之以約誓將以固其黨與而求其所大欲而不知信之不由中盟何益哉徒見以長亂耳春秋於此貶其爵而稱人賤之也若曰無道之君不足以當王爵也則其慢鬼神犯刑政之罪可見矣是故始不書爵則不知其爲三國之君後不書人則不足以瘳三國之惡故前書爵而以來戰著罪後書其盟而以奪爵示貶屬詞比事之教不亦深切著明矣哉厥後不出三年鄭伯果合紀魯而戰齊衛明年齊

衛又聽宋人之言而伐鄭誓言果足恃乎卒之連兵結黨惟利之從今日取賂而納突明日納朔而歸俘使兄弟之倫君臣之義委諸草莽而不存也然後王綱斲盡而天下變爲伯矣吁春秋深貶惡曹之盟其有以也夫

季孫宿會晉士匄宋華閱衛孫林父

云

于戚晉人執

衛行人石買

黨大惡而治小罪此晉伯不競之所由也夫伯主之所以能宗諸侯者以其能明天下之大義也今衛孫林父逐君而立不正大惡也晉人乃合諸大夫于戚以列其罪人于會矣至于石買之伐曹較之林父非小罪乎晉則因其來使而執之

無乃不能三年而總小功之察也乎觀春秋書于戚之會於前而書執衛行人石買于後則晉之所以爲伯主者可知矣云昔者桓王不討宋魯而伐鄭以致繻葛之敗王綱始大不振而春秋譏其不天爲其不知輕重之倫也今有以臣逐君以弟篡兄則相與爲謀以成其亂而欲以威力禁與國之爭吾知其無益矣故曰放飯流歎而問無齒決是之謂不知務其斯之謂與是故孫林父衛之強臣也昔也不能事君而出奔晉又介於大國以歸其國非定公之所欲也其於先君且然矣於嗣君乎何有丘宮之盟殺三公子尹佗之追直欲以一矢加之君臣不帥職而增滌發洩罪孰大焉晉悼惑師

曠之邪言及中行偃之妄議不能共行天罰而反爲之合七大夫于戚以定其所立之人其何以爲訓乎遂使亂臣賊子得有所恃以縱其惡而無所忌憚也不亦甚哉若夫石買之伐曹非無罪也然而毀瓶之怒起于孫蒯當是時也衛侯在外未入而僭竊之剽猶立于位也使晉平因曹人之愬治其舊惡告于諸侯復術廢剽執孫林父而戮之不亦善乎今也舍此弗問而執石買徒以伐曹之故伯討宜不如是矣春秋先書于戚之會旣出林父之名而繼於衛侯出奔之後後書晉執石買而貶稱人且曰執衛行人則晉人黨大惡而治小罪之失可見矣嗚呼買可討也置林父而討買則不可也於

是乎可以知春秋之權衡矣故以悼公之賢而伯止于蕭魚
至平公而遂有溴梁大夫之縱則皆黨孫氏之效也諸侯之
貳豈必假羽旄之事哉向使晉人以會戚之大夫而討逐君
之罪以執石買之怒移于孫氏則晉之伯業未可量也而不
能焉惜哉他日樂盈入於曲沃而趙鞅入于晉陽荀寅士吉
射入于朝歌大夫相繼而起其患不減于林父三家競爽而
靖公廢爲家人其禍不止于衛侯故曰出乎爾者反乎爾者
也又曰始作俑者其無後乎推原其由則于戚之會可勝憾
哉

吉禘于莊公作僖公主

禮失於亟而復失於緩春秋所以病望國也夫喪祭之禮各
有其時緩與亟之失均也何謂亟莊公喪制未終三年而閔
文公之失不可蓋矣送死人道之大變而不謹其禮屢霜堅
冰之兆也其可以爲小失乎嗟夫禘者天子之祭也魯僭天
子以爲常不可勝書也作主者事亡之常禮也不必書也今
皆見于春秋之經矣爲國以禮而祭祀又禮之大者而至于
如此此時之魯尚可爲周公伯禽之魯乎又其甚者禘太廟
以致妾母縱逆祀以亂昭穆魯之禮不可言矣周家之禮周
公所制以周公之子孫而壞周公之法度吾於他國又何望
焉嗚呼周公之衰矣

曹公孫會自鄭出奔宋

賢者之後能不失其去國之禮春秋所以著其美也夫聖人不以常事過褒於人臣其有所褒者必其有以取之矣是故大夫去國待放而後出奔常禮也曹公孫會能行之于春秋之世則既賢於當時之人矣而况又爲子臧之後乎春秋特因其出奔而書曰曹公孫會自鄭出奔宋鄭者其食邑也自鄭而出奔者待放也曹大夫鮮有以名氏書其曰公孫賢也而又賢者之後也一人而二美具焉可不書乎古者大夫有罪待放於其境三年君賜之環則復賜之玦則去是臣子之常禮也特入春秋君臣道喪久矣故臣子能專其邑者無不

叛其國能使其衆者無不要其君以臧武仲之智而據防以求後况其他乎今有人焉語其世則賢人之子孫也觀其所公遂行吉禘之祭無乃太早乎何謂緩僖公卽世十有五月而文公始作練祭之主則又太慢矣先王制禮以節人情亟與緩同爲不敬魯爲秉禮之國而若是焉可歎也夫古者三年之喪畢致新死之主于廟廟之遠主當遷入祧於是大祭于太廟以審定昭穆之序其禮有常期也諸侯既葬則反虞虞主用桑期年而練祭練主用栗故特祀之於寢而不同於宗廟以昭其孝思之誠其日有定數也今閔公既失之於亟而文公又失之於緩一緩一亟皆以已意行之先王之制紊

矣聖人愛禮甚矣寧不爲周公之魯惜哉自今觀之吉禘于莊公在閔公二年之五月莊公之薨至是二十三月則三年之喪未畢矣喪未畢也而可以行吉禘之禮乎禘非魯所當用姑置未論今先君方祀于寢而非宮廟遂用盛樂而行吉禮三年之愛忘矣爲子而忘三年之愛是不有其父也是事也一舉而三失禮也故春秋禘祭不書因其亟而書曰吉禘見其用吉之早也曰于莊公明其于寢也而閔公之失不可掩矣作僖公主在文公二年之二月則僖公之薨十有五月已過乎期三月矣過朞而猶未作主可乎生事死祭禮之大節以先君練祭之主而作不及時以爲微而忽之慎終之意

蔑矣事父而蔑慎終之意不可以爲子也是事也積惡之原也春秋於他公作主不書以其緩而書之且謹志其日焉而行又有異乎當時之人則君子又烏得而不錄之哉若曹之公孫會是已夫公孫會者公子喜時之後也喜時者何所謂子臧是也子臧者曹宣公之庶子宣公伐秦而卒于師曹人使公子負芻守而使喜時逆曹伯之喪負芻乃殺太子而自立子臧將亡負芻懼而告罪乃反致其邑焉及晉侯之執負芻也將見子臧於王而立之子臧辭弗立而奔宋曹人所謂社稷之鎮公子也今會之出亡也雖不可知其故然當衰亂之世獨能行古人之禮故其去也不卽走于他邦而居于鄭

則非有大罪也明矣居鄭而君不賜之環矣然後徐徐焉自鄭出奔宋其進退之間雍容不亂隱然有子臧之遺風焉可謂不墜其世德矣觀于子臧已如彼而子臧之後又如此子臧其不泯乎春秋之義善善也長而惡惡也短惡惡止其身而善善及其子孫安得不特書以著其美也哉故奔未有書自者而書自鄭則知其爲待放也曹無大夫唯公子首以鞶之戰特書以示貶此則特書公孫則知其與之也不書其入于鄭則非叛也自鄭出奔而不以鄭繫之曹則與宋華亥向寧華定自宋南里出奔楚者不同也由此觀之聖人之情見矣抑嘗論之國之衰也未嘗不由親小人而遠賢臣也是故

維鴛在梁刺于詩人乘軒三百數于伯玉其來久矣故子臧賢公子也致邑與卿而不出公孫會好禮者也去國而入于宋然後白雁來而公孫疆出矣且不得以亡國之善詞書于經嗚呼悲夫觀魯論記太師以下踰河蹈海而知魯觀春秋書子哀來奔而知宋吾於公孫會之去也而又有以知曹矣

秦伐晉狄侵宋楚子蔡侯次于厥貉

疆國並起而伯勢分春秋所以深爲世道慮也世至文公中國衰而外彘強矣是故秦有伐晉之師而狄亦爲侵宋之舉二強並起遂使楚子得以乘間而挾蔡侯次于厥貉以與晉爭伯春秋秋秦于前而爵楚于後然則成楚之強者秦與狄

也觀伐晉侵宋而次厥貉書于一年之間諸侯之無伯害哉
嘗考春秋之時倚方漢之險以憑陵諸夏者楚也據嶠函之
固以抗衡伯國者秦也恃豺狼之爪牙以逞其貪婪者狄也
桓文不作伯業不振無歲不有秦狄之師無國不有荆楚之
患春秋不以秦狄之患爲憂而以秦狄黨楚爲憂者何哉蓋
當時天下之所倚賴者一晉而已今荆旣盛于南而秦又起
于西狄又跳踉于北三強競爽不弱一箇焉晉之世伯不易
守矣是故秦人伐晉而楚遂滅江秦晉戰于令狐而狄遂侵
我西鄙楚師至于狼淵而狄又有侵齊之告何其不約而同
耶南彛與北彛交中國不絕如綫可不懼哉况於晉君冲幼

不在諸侯於是起范山之邪謀生蠻荆之禍心救鄭不及楚
人遂有以覘其不能聘魯而傲楚人遂敢以試其偏強而北
方之圖堅不可破矣彼秦者晉之姻親也令狐之役晉不謝
秦固不直矣而秦納不正豈爲無罪康猶不悛不顧義理之
是非而惟以報復爲事興兵伐晉以取北徵當楚狄交亂之
際而乘時肆暴陵轢諸侯之盟主是以夏而爲彛之行春秋
以狄待秦者晉之失伯秦爲之也由是狄患遂肆而三恪之
宋首被其侵雖曰潛師以爲侵掠而豺狼之毒寢不可遏是
役也非特爲宋患也將天下之患自此始矣於是楚人知中
國之多故而乘勢以興厥貉之次以臨宋也臨宋所以圖北

方也而宋果以狄難不能禦遂道以田孟諸夫以變彛覆載不容之罪人儼然入于中國驅諸侯而奴役之天下之變有大於此者乎故楚從此遂得書子同于中國以其強之成自此始矣春秋狄秦于前而進楚于後豈無意哉觀楚秦相與滅庸相與盟于蜀而他日呂相絕秦之言亦謂穆公卽楚謀我則秦之黨可知矣自是以後楚伐麋而狄侵齊楚圍巢而秦戰河曲新城之盟僅僅收拾而齊又叛晉人置不敢問不欲更生一敵以爲東顧之憂也而不知文襄之業堂堂然去矣嗚呼狄不足責也楚亦污於荆蠻久矣秦之先死于王事有功於周室者也穆公以于喟之敗出悔過之誓言聖人錄之使其由是而進于善則其伯豈止西戎而已哉奈何連兵數歲不能成尺寸之功而徒以成楚人之暴抗嗚呼春秋狄秦而至于再其有以也夫

宋人衛人入鄭宋人蔡人衛人伐戴鄭伯伐取之

諸侯連兵以爲暴而敵國又乘其後春秋所以交責之也夫兵聖人之所惡而况以詭詐相報復乎宋衛聞鄭師之在外而乘虛以入其國旣入鄭矣又召蔡人以伐戴則其阻兵肆暴未有若此之甚者也而不虞鄭伯之起乘其弊伐而兼取其師焉夫宋衛固不義矣而鄭亦豈得爲義哉春秋書入書伐又書伐取則爲交責之也可知矣周官九伐之法大司馬

掌焉列國而非王命不敢擅運其兵也東遷以來王綱不振諸侯各自爲黨以奸詐爲仁義視殺戮爲尋常侵奪紛紛莫之能禁其罪可勝誅哉今鄭師以伐宋出宋人知其國之無守也於是挾衛人以擣其虛所謂攻其無備出其不意之謀也果然造鄭國都如入無人之境是宋衛之得志於鄭矣二國旣已入鄭而驕故以伐戴召蔡借曰鄭有舊怨戴何罪乎不過乘時微利以凌弱而犯寡耳則其阻兵安忍之惡極矣而不知鄭莊之計又巧也方二國之入鄭也鄭師已在郊矣不還師以自救而委國與之避其銳也及其旣伐戴而圖之擊其情也是故駐師于郊多方以誤之彼宋衛徃於入鄭之

役謂己實無敵矣而不虞鄭伯之亦掩其不備鄭攻其外戴應其內一舉而三國之師盡沒亦可爲好兵毒衆者之戒矣嗚呼宋衛以是施之於鄭而鄭又以此反之其民何罪而魚肉之若是耶然則宋衛蔡鄭皆不可以逃王者之刑也春秋此書其事而四國之惡彰矣抑嘗考之春秋之初以詐用兵莫甚於宋鄭也前此宋人伐鄭圍其長葛鄭則輸平于魯而不之救長葛見取於宋猶不顧也宋人自謂無能爲矣不知宋魯之黨旣離而郟防之取繼至則宋已墮鄭之術中而不寤也至此又蹈其前轍焉卒於民不堪命禍發蕭牆嗚呼若宋之殤公所謂自取之也夫

齊人鄭人入邾蔡人衛人陳人從王伐鄭

假王命以逞其私忿抗王威以肆其不臣甚矣鄭莊公之不道也夫諸侯而不知有王惡之大者也鄭伯憾邾之不會伐宋於是託於王命而挾齊人以入其國入者不順之詞也則其假王命以逞私忿者可見矣既而以不朝得罪於王王帥諸侯以討其罪乃敢用兵交戰于繻葛王非諸侯之敵者抗王威以肆其不臣其罪又何如哉春秋於入邾書人書入以著齊鄭之罪於伐鄭不言戰敗所以存天下之防也嗚呼鄭者宣王之懿親我周之東遷晉鄭焉依則鄭實王室之藩屏也奈何寤生以小人雄連諸侯以逞其不義東遷之初實

爲無王之首是故伐衛而專征伐之權盟石門而亂司盟之法溫麥周禾君臣道喪取邑易田滅紀廢典則其不知有王也久矣至是以兵入邾果欲尊王室哉觀繻葛之一戰可以究其姦雄不道之心矣夫邾者文之昭也當魯之九年鄭人伐宋召邾而邾不與非邾罪也鄭莊以其嘗爲王之卿士而託於王命以欺諸侯於是合齊人以虐邾而誣以違命之罪干戈戎馬造其國都而王臣不行王師不出則其矯假之罪已明而猶未也一旦王奪其政遂懷忿而不朝以致天王奮怒躬帥三國以伐之此舉雖非天討而鄭之見伐于王尤足信其入邾之爲矯矣不然鄭方糾逃王慝何至自受王師之

伐也哉王師既至乃不俯首請命而敢執干戈與天子周旋
繻葛之後至以一矢加之乘輿逆理悖道而有若此者乎春
秋不言其戰與敗所以爲王諱而存天下之大防也雖然鄭
之所以敢抗王者未始不由入郕之役致之也易曰履霜堅
冰至矯制入郕而王不問然後大假王命以制諸侯於是而
人許於是而納馮志得意滿遂有繻葛之舉矣自繻葛以後
而王命不行伯圖遂啓故夫東周之不振皆寤生之所爲也
論而至此鄭莊之罪不容誅矣而齊以太公之裔賜履之命
非不重也乃不能以義制鄭而從其所欲然則椽父者亦寤
生之徒與

杞子來朝公子遂帥師入杞

事人而失其禮者固可責責人之失禮而加以兵者尤可罪
夫惟智者爲能以小事大而仁者爲能以大事小也若杞者
可謂不知而魯亦可謂之不仁也歟夫杞不朝王而朝魯非
禮矣况以中華而用彘俗以彘變夏杞之罪容可免乎魯之
於杞有婚姻之好焉誨之以文告加之以訓辭抑豈不可而
公子遂帥師入其國則太甚矣春秋交著其罪故杞本伯爵
而貶稱子狄之也公子遂帥師言其用大眾也入者不順之
詞也而二國之罪皆無所逃矣昔者太王之事昆彘以小事
大者也其詩曰肆不殄厥愠亦不隕厥問曷嘗自外於禮乎

湯之事葛以大字小者也其書曰乃葛伯仇餉初征自葛曷嘗以失禮而遽伐之乎春秋之時人心斃壞天理不明故小國安于僻陋而無自強之志大國矜其威力而無仁愛之心於是并吞並起弱肉彊食然後禮義衰而干戈橫行中國微而彘狄暴橫莫之能禦夫豈無故而然哉且杞者先代之後先王以之備三恪而作賓者也今而棄命廢職忘先君之所事守不能居其封爵亦可鄙矣縱以微弱之故欲恃大國以鎮撫其社稷則有先公之遺法在何至以夏后之子孫用東彘之習俗投章甫而襲左衽變禮樂而言侏離已則無禮以汗大禹之明德其何罪大焉春秋因其來朝之用彘禮遂從

而彘之以見杞之自絕于中國也由此觀之杞則誠有罪矣奈何魯以周公之胤周禮所在彼小國不能自振而倚我大國以爲援其情亦可矜也而况於伯姬在杞甥舅之好庸可棄乎彼之來朝豈不有慕於我而爲是僕也乎威儀文詞之不類進退揖讓之或愆胥教胥誨以引以翼以繼武王周公興滅舉廢之心可也今也不然來朝之車甫旋而上卿授鉞直造東樓之國舍曰有罪何至於此彼以其卑我以吾暴嘉善而矜不能之意果安在乎春秋書公子遂帥師入杞繼于杞子來朝之後則杞之失禮可罪也而魯之不道不亦甚乎抑嘗考之桓之二年杞嘗朝魯未幾而魯亦入杞則杞每以

朝魯而受其兵何哉桓不足責也僖公號稱賢君而亦若是耶禘太廟致夫人而嫡妾之分失愛季姬遇鄆子而閨門之防亂况又從楚盟齊乞師於楚使天下淪於塗炭魯之爲魯庸愈於杞乎不省已而以責人嗚呼微春秋不仁者皆得以文其惡矣

及晉處父盟公孫敖會宋公

云

晉士穀盟于垂隴

受人之非禮而效其尤者罪在望國待人以非禮而貳其過者罪在伯主夫大夫不可以抗諸侯禮之大節也今也文公朝晉而及晉處父盟是晉以非禮加魯而魯受其辱矣奈何垂隴之盟宋陳鄭之君在焉而我以公孫敖會之晉又以士

穀主之晉既貳過魯亦效尤遂使君臣之分從此大紊於天下誰之咎耶春秋於處父之盟沒公不書而處父去氏於垂隴之盟則據事直書而罪自見矣夫司盟之法已非列國之所當專况於以大夫而與諸侯盟乎周道衰微王綱解紐及邾盟蔑隱公實肇其端至于浮來之軟降尊從界于折之盟以下援上則亂常失序皆自我魯爲之寧不重可歎乎齊桓朔伯而以公子結抗盟爲討于防之軟魯又不祥直至後幽之盟齊伯大定二十餘年綱紀粗立抑何幸歟晉文以譎王諸侯而翟泉之役首爲厲階王臣且不顧矣况與國乎襄公當國家多難之時不知以禮信屬諸侯而以不朝來討文之

伯也未能改物何遽至此我文公不能以周禮自守而畏大國之威奔走聽命辱莫大焉晉侯不念同姓之懿而暴蔑周公之裔胄以宣示其侈處父大夫也敢盟天子之公侯乎滅紀廢典以干先王之法度其何罪如之春秋沒公以爲魯諱魯人耻之君子亦耻之也至于垂隴之會宋以三恪之賓陳以虞帝之後鄭以宣王之懿親咸與在列而晉又使士穀主其盟是晉襄之待諸侯皆以大夫當之矣一之已甚其可再乎晉不足責也魯亦可以省矣人以大夫盟我我之辱也敖也何人而使上敵三國之君辱於人不戒而亦此辱人夫效尤禍也不知政權下逮自此始矣是故有處父之盟而後有

垂隴之盟晉有處父士穀而魯有公孫敖相視而起相觀而化三家六卿之禍萌矣春秋嚴謹始之法故深貶處父而垂隴之役遂列二子之名氏非但直書以從同而已也若曰大夫之交政于天下自此始也由是而大夫皆得以名氏書于經矣仲尼曰始作俑者其無後乎由是晉有趙盾魯有仲遂紛紛迭起而桃園之事過市之哭繼見嗚呼濫觴之不塞孰滔天之可遏履霜之不謹知堅冰之必至他日昭公逐哀公走靖公廢乃其效歟然後知春秋正名辨分必謹于始爲後世慮至深遠矣

楚人伐鄭公子遂會晉人

云

云救鄭楚子使椒來聘

外彘猾夏而中國失禦侮之道故外彘遂強而用中國之禮焉此彘夏盛衰之夫機也夫外彘之所以強皆由中國不振而已矣當我文公之時晉靈少懦不在諸侯楚人師于狼淵以伐鄭是以此嘗晉之能否也晉大夫以五國之師救鄭而緩不及事春秋貶大夫而人之以見中國之不振自此始歟由是楚勢遂張而使椒聘魯乃以爵書而君臣並見然後華彘無復辨矣可不爲之寒心哉嘗謂彘狄猾夏未足憂而中國之衰爲可憂何哉當齊桓割伯之時荆始入蔡而伐鄭其勢張矣桓公同盟于幽之後荆始來聘其進不過書人而國號且未改也既聘之後屢駕伐鄭而改稱楚不駸駸乎強大

而將不可遏歟然而次陘之伐振旅于前而城濮之戰獻捷于後終桓文之世不得以爵見經以中國之有人也城濮以來楚人不敢北嚮者十有五年今而忽起伐鄭之師寧不謂中國無人而可以逞其願乎是役也實華彘盛衰之大機也晉之執事不思折衝禦侮以消外患雖起救鄭之師而逡巡畏縮不卽赴敵遂使鄭國失三大夫不得已而及楚平誰之咎耶春秋於伐鄭之楚猶以人書向使晉能遏之於此亦何致遂成其強哉惟晉人不識事勢而坐失其機然後強彘得遂其志而越椒來聘公然以中華之禮行乎望國觀其以玉帛而來固異乎執干戈以從事推原其心豈誠知義而慕之

者哉不過借此以爲窺覘之計耳春秋於救鄭之役貶諸大夫而稱人而中國之失策自此始也至于來聘之役遂進楚而稱子以蠻荆之得與齊晉並肩自此始也由是而次厥貉由是而侵陳遂侵宋無乃濫觴于伐鄭而滔天于聘魯也歟甚而至于辰陵之盟于邲之戰首足遂倒懸焉然則晉靈趙盾長亂之罪無所逃矣或曰來聘之舉傳謂與之今子之云得無異乎曰君臣並書固與之也而寢強之意見焉不然何以從此而凡役得書爵耶愚請爲之說曰滕子來朝自是而皆稱子若曰滕之淪于彘狄自朝桓始也楚子使椒來聘自是而得稱子若曰楚之進于中國自聘魯始也吁聖人之旨

微矣哉

齊侯使其弟年來聘有年

禮施於不當施之人者人事之失瑞降于不當降之國者天道之變也夫時聘結好常禮也而以爲非何哉魯桓以不義得國王法所當討也今齊侯使其弟年來聘茲非人事之失乎百穀順成嘉瑞也而以爲異何哉魯桓以不義得國天理所不容也今五穀皆熟以有年茲非天道之變乎在他君以聘問爲禮而施于桓公則非在他君以有年爲常而降于桓公則異聖人之旨微矣哉嘗謂春秋之作無非爲存天理正人倫計也人事舛則倫不正天道僭則理不明聖人上奉天

時下立人紀故有賞刑之庸而有燮理之道焉春秋天子之事也安得不於天人之際交致其謹也哉是故魯桓篡隱而奪其位人倫之大變也執之者無罪殺之者無禁暴明其惡恭行天罰宜也魯之臣子義不戴天而莫能討則隣國之所當舉法也况於太公實受賜履之命齊可以不問乎奈何不修方伯之職乃使其貴介弟將玉帛以修好人事之反其常未有甚於此者矣春秋書曰齊侯使其弟年來聘所謂禮施于不當施之人也桓篡隱而有其國天理之大變也不有人禍必有天殃旱乾水溢疾疫饑饉宜也天下諸侯視以爲常而莫能討則惟天能誅之耳况於豐年之瑞當應于有道之

國魯何以致此乎奈何不有凶災之譴當其卽位之三年乃獲五穀皆熟之慶天道之反其常未有甚於此者矣春秋特書曰有年是謂瑞降于不當降之國也春秋深明天人之理安得不以爲非常之事而謹書之哉厥後宣公之惡猶桓也元年齊侯與之會于平州以定公位則亦僖公修聘之類也十六年而大有年則亦桓公有年之類也人事之失天道之變春秋特於二公備之聖人誅亂討賊之法嚴矣哉雖然弟年來聘齊之罪也而有年之瑞天亦僭乎以桓公在位十有八年大水螽災每見于經而僅一有年則他歲之歉可知矣桓公之罪可誅而周公之遺民不可殄也天爲民而有年豈

桓公有以致之哉不然彭生之難亦不異於為民之禍何耶故曰天定亦能勝人不可誣矣

考仲子之宮築王姬之館于外

望國以非禮為禮春秋書之所以正其失也夫知其不當為而為之者天下之大罪矣故仲子惠公之妾也不當祀以夫人之禮而隱公成其父之邪志為別立宮以祀之蓋自以為得禮而不知其非禮也齊者魯之仇也不當為之主婚而莊公忘其父之仇為築王姬之館于外亦自以為得禮而不知其悖禮也由此言之豈非故為其所不當為者乎此春秋所以深惡之也古者庶子在父母之室為其母不禫所以厭於

尊慈母與妾母不世祭所以降於嫡此禮之當辨者也况以妾母而敢立宮以尊之乎父母之仇不共戴天兄弟之仇不與同國九族之仇不同鄉黨此義之當行者也况以父仇而敢築館以主其婚乎今隱公紊嫡庶之分而莊公忘父子之親天理絕而人倫亡矣春秋安得不深責之哉且仲子者桓公之妾母也隱公承先君之邪而讓非其所當讓將立其子而先尊其母特以孟子既入惠公之廟則仲子不得與之並享則非不知仲子之為妾矣故特奉之以別宮自常情言之則不敢致諸太廟而別立宮焉疑若稱也由君子觀之則謂公雖不敢樹仲子於太廟而立宮之禮亦非故春秋因其始

禮而書曰考仲子之宮考者始成而祀也不曰夫人而曰仲子正其名也而隱公之以非禮爲禮可知矣莊公之於齊不共戴天之仇也天王嫁女于齊而使魯爲之主害義甚矣爲莊公者泣血以請辭焉而勿從之可也奈何藐然不顧而遂受命焉然不館之於國內則非不知其不當爲也故特築王姬之館于外自常情言之則築館于外不失居喪之禮疑若可也以大義言之則公也方當寢苫枕戈之時而與仇人主婚姻之禮不亦悖乎故春秋特書築王姬之館于外則莊公之以非禮爲禮又可見矣夫考宮常事也其得爲者不書而考仲子之宮則書以其亂夫婦之倫也考宮書于上而繼之

以初獻六羽六羽尤非仲子所當用則隱公之罪不可逃矣魯王王姬久矣其得爲者不書而莊公之王齊婚則書以其忘父子之倫也築館書于上而繼之王姬歸于齊歸齊則非魯所當主而莊公之罪不可追矣斯二者三綱之所繫也春秋安得不深謹之哉嗚呼魯之禮若是耶而曰猶秉周禮也然則當時諸侯之於禮可知矣

會于蕭魚秦人伐晉莒人伐我東鄙圍台

伯主旣服貳國而不能制外患此春秋之所惜也夫功不在大而患不在小也惟不慮患于功滅之後則未有不失之者矣晉悼公登三駕之勞以得鄭于蕭魚之會此中國莫大之

功也奈何秦人繼之以伐晉借曰秦晉仇也曩爾莒乃敢伐我東鄙而圍台彼固有以覘晉之怠矣而當悼公之世有是焉寧不深可惜哉故自蕭魚而晉伯衰矣吾嘗觀于齊桓公矣方其伯之盛也攘葵狄恤與國糾逃王慝如恐弗逮何其勤耶至于葵丘既盟怠心遽肆由是楚狄交熾公不能抑君子傷之以爲有始而無終也然而緣陵之城救徐之役功雖不足猶有事焉而未至如晉悼之遽自畫於服鄭也人徒知葵丘爲桓公盛衰之會又孰知夫蕭魚爲悼公勤怠之機耶何也悼公之入國也逐不臣七人以治內圍宋彭城以治外而復伯之權輿已在此矣由是而睦諸侯和我狄三分四軍

以待來者其勤爲何如耶故鄭人之未服也申之以五會震之以三駕屢盟而屢叛屢叛而屢伐公亦知服人以威之未盡善矣於是乎肆青圍鄭聊以張吾三軍而納斥侯禁侵掠旋繼于行成之後講好會而卻擔盟推至誠以待鄭使反覆之人不惟面革而有服其心庶幾乎王者之氣象矣奈何服鄭之後遂自縱弛秦虎狼也黨楚而來謀我盍亦預爲之防乎今也徒知一鄭之服爲可喜而不知外侮之至爲可憂蠶蠶有毒况敵國乎秦人來伐乃使士魴以孤軍禦之卒易秦而不設備于櫟之戰不敢以告諸侯亦可耻矣比及明年僻陋在葵之莒亦敢興師伐魯而圍其邑夫魯晉之同姓事晉

讀意何文集
最謹而舊敢陵之豈徒弱魯而已知晉之急而不畏也觀春秋書蕭魚之會而繼書秦人伐晉明年又書莒人伐我東鄙圍台無乃與盟于葵丘而繼書狄滅溫楚人伐黃之事類乎雖然蕭魚之會晉悼之終也諸侯賴之稍獲息肩當衰亂之世亦可謂之小康然以聖人之王道律之則不然矣悼公以清明之資而止于此寧不深可惜哉悼公沒晉伯替矣推原其由悼公之政大抵以大夫分之當其盛也有荀罃魏絳之良及其衰也伐秦制于欒黶而會戚惑于荀偃師曠然駭駭不振而溴梁之兆見矣無競維人豈虛語哉

宋皇瑗帥師取鄭師于雍丘鄭罕達帥師取宋師于岳

列國互用詐以相覆春秋直書之亦可見出乎已者之反乎已也夫兵聖人之所惡也而况於以詐謀交相傾覆者乎我哀公之九年宋皇瑗帥師取鄭師於雍丘越五年而鄭罕達又帥師取宋師于岳夫取者悉虜而俘之也成師以出而使敵人得盡取之則敗者必有不備不虞之失而勝者必有出其不意之計詐謀並作仁義塗炭寧不重可憐哉觀春秋書宋鄭互相取師之文可以有所感矣先王用三驅而不掩群君子鈞而不綱弋不射宿待物且爾而况人乎時入春秋諸侯放恣干戈相尋靡有寧歲用詐逞奇紛紛而莫之禁以奸宄爲仁義以殺戮爲尋常在王法不可勝誅矣今鄭大夫欲

外取邑以與嬖人於是乎有圍宋雍丘之舉其罪豈不大哉
春秋乃舍鄭人之圍邑而專著宋人取師之罪何也夫敵加
於己自反而有禮焉則修文告以卻之不得則告于天子請
于方伯必有能伸之者今也不然則圍鄭師於雍丘日遷舍
以合壘是宋人之志在於盡割其衆而異於解罔視禽者矣
則不仁孰大焉故春秋不書鄭之伐宋而但曰宋皇瑗帥師
取鄭師於雍丘言取則無一人得脫可知而鄭之懸軍深入
自取敗亡之罪亦可見矣佳兵不祥之器出乎爾者必反乎
爾矣不越五載而鄭罕達又以取宋師書于經夫向巢欲盡
平元之族而圍崑亦猶鄭人之圍雍丘也鄭罕達救崑而圍

宋師亦猶皇瑗之救雍丘而圍鄭師也則鄭人之志亦在於
報宋必欲悉虜而俘之矣彼以不道施諸我而我又以不道
報之以怨易怨當何時而已乎春秋亦不書宋人之伐鄭而
直書曰鄭罕達帥師取宋師于岳則用詐之罪在鄭而宋之
不備不虞以取喪敗之罪又可知矣夫國以民爲本君子之
愛民也如保赤子不時且不敢使况以私忿小怨驅而納諸
陷阱之中使其肝腦塗地骨肉離析至此極哉有伯者作且
不可容律以春秋之王法皆當服上刑矣抑嘗考之春秋之
初書曰宋人衛人入鄭而繼之曰宋人蔡人衛人伐戴鄭伯
伐取之是二國之以詐謀相掩非一日矣桓文迭起而取師

諫意作文集
之文不見于經至是乃兩見焉而又出于宋鄭宋以先代之
後作賓王家而鄭以母弟懿親蕃屏王室而壞法亂紀至于
如此可勝誅哉嗚呼觀宋蕩鄭莊於春秋之始而知天下之
無王觀宋皇瑗鄭罕達於春秋之終而知天下之無伯始而
諸侯終而大夫又可以言世變矣

仰孫羯會晉荀盈

云云

城杞晉侯使士鞅來聘杞子來盟

伯主以天下私其親故命使施禮爲可鄙而屈身要信爲可
賤也夫惟義可以率人苟以其私則無以令與國矣今晉之
平公以杞出之故合十二大夫而城杞役諸侯以私其母家
罪莫大焉是故旣城之後而使士鞅來聘來聘所以拜城杞

也未幾而杞子又以來盟至魯來盟所以拜杞田也此事以
觀則其以不義動人而有不慊於心者可知矣然則晉之失
伯不亦宜哉夫伯者所以合諸侯而匡天下也苟以德命誰
敢不從是故齊桓公以諸侯之師城邢封衛天下翕然以存
亡繼絕之美歸齊不聞桓公之遣使以謝諸侯而亦不聞邢
侯衛侯之親往結盟于諸侯也而邢遷如歸衛國忘亡其功
爲何如哉惟其心在於公義而非爲私也今晉侯以奕世之
伯號令諸侯非弱於齊也而城杞之後僕僕焉來聘來盟之
不暇寧不可鄙賤哉何以言之晉平之母杞女也杞於是時
非有外患如邢衛之在齊桓時也德則不競而介於大國以

勞諸侯夫諸侯者天子之諸侯也非晉國之役也昔者平王不撫其民而成母家詩人有束薪蒲楚之刺君子傷之而况於晉乎今晉臣彪不恤周宗之闕而夏肄是屏於是乎合十二國之大夫勤版築于東樓之杞文之伯也未至改物何以有此棄同卽異不仁役人以私不義不義不仁何以爲伯主當時魯鄭大夫有甚乎之嘆而不敢違也則天下皆知其不當爲而晉亦自知其不可矣城杞之役甫旋而士鞅之聘踵至謂區區禮文之未可以蓋其愆而收諸姬之心乎則其鄙也不待貶而自見矣既成其國又治其田使晉命之出于公魯何敢不盡歸乎今瘠魯以肥杞乃以卿大夫相繼于朝府

無虛月之故則晉之所以令諸侯者利而已矣來盟以固歸田而以國君親其事且不守中華之禮而用彘俗焉夫以土田之故親辱于是徇利也以先伐^代之後而變于彘是棄禮也禮虧利勝其能國乎嗚呼晉以城杞之故而來聘杞以得地之故而來盟則伯主之所以爲伯主杞子之所以爲諸侯皆可知矣春秋於城杞則列序十二大夫以著其動衆之罪而繼之以晉侯使士鞅來聘又繼之以杞子來盟杞稱子賤之也蓋嘗攷於斯時天下甚多故也吳楚交政于中國此何時耶平公舉七世之伯業一朝付之於楚自謂可以奠枕而居矣不知于號之會再讀舊書于申之役楚主中夏他日將

通少習之言一出而執戎蠻子赤歸于楚如事天子然誰生厲階至今爲梗蠻彘侮其外而大臣叛其內晉國卒剖而爲三則皆平公之罪矣城杞之役可勝歎哉

楚人伐黃楚人伐徐公至自會

外患自遠而至近春秋危望國以見伯業之衰也夫華彘之勢不兩立伯業衰則彘強矣當齊桓之暮年楚人伐黃而公不救然後楚復伐徐夫黃遠國而徐在山東與齊爲隣非外患自遠而至近乎是以牡丘之盟春秋始書公至自會而桓德之衰與國皆有可危之勢於是因魯以見其餘也楚之爲中國患久矣東遷以來僭號稱王憑陵上國尚賴齊桓朔

伯以攘彘安夏爲己任是以有次陘之役而中華之勢復振抑何幸也奈何葵丘既會震矜遂生一念之怠前功遽廢使強彘得以忖度其心而前日相與周旋之國悉蒙其患自遠以及于近豈不駸駸乎剝牀及膚也哉觀春秋危公之意亦可懼矣且夫黃自貫澤受盟于齊於是陽穀之會相爲犄角以牽制楚人之肘腋用能致屈完之來盟則黃實有功於齊也今楚人敢興兵以伐黃無乃討其前日從齊之故與黃以從齊見伐于楚則楚師之起乃所以嘗齊也齊既視黃而不救然後浸淫而及徐鳴鐘擊鼓將問徐以何罪不過爲其附齊而取舒也借曰黃遠國也雖鞭之長不及馬腹徐在齊

之宇下可不被髮纓冠而往救之乎始之伐黃則置而不恤繼之伐徐則救而不亟則桓公之不競不足庇與國可知矣是故春秋凡桓公之盟會皆不書至安之也至于牡丘之盟始書公至自會夫楚之患自黃而及徐矣徐之去魯不遠也輔車相依唇亡齒寒寧不有無厭及我之患乎嗚呼豈獨魯也天下之從齊者莫不岌岌乎殆矣春秋魯史故至公以著其危而他國從可知焉商書曰靡不有初鮮克有終吾於桓公見之矣厥後公卒未幾而楚遂至其國都以盟魯鄭陳蔡越八年而以師伐齊取穀至是則盟貫取舒進次于陘之憾悉報無遺嗚呼向使桓公敦不息之誠當楚人伐黃而振旅

焉天下事豈至此也或者謂桓公初致江黃之時管敬仲嘗有言矣桓公不從而卒貽禍于二國吁仲之言是也而未知道也使其能引公以正心修身而行王道則豈無自彼氏羗莫敢不來享莫敢不來王之遺事乎而仲不能也使小國賢君欲自援於蠻獫之汙而不克遂其志君子蓋深傷之不然仲之器不小矣

吳入郢於越入吳公會晉侯及吳子于黃池於越人吳強國每逞力於外而不虞敵人之乘其後觀春秋書吳之事亦可以爲戒矣方吳之敗楚而入郢也師猶在楚而於越乘虛以入吳亦可警矣至于黃池之會方與晉侯爭長何不虞

於越之又入其國耶春秋始書於越入吳于吳入郢之後再
書於越人吳于公會晉侯及吳子于黃池之後則其虛內事
外阻兵安忍之效豈不深切著明也哉嘗謂以力勝人者人
亦以力勝之此理之必然也春秋之季吳國天下莫強焉長
岸雞父之戰滅巢滅徐之交經不絕書猶曰以蠻蕞而攻蠻
蕞也及其勝楚則遂及齊而及魯及晉若火之燎于原不可
嚮邇自以爲莫能敵己不知禍亂相尋罔有紀極東南又生
一越爲其腹心之患一之已甚而至于再姑蘓之棲兆矣豈
不可爲陵人而不顧己者之大戒哉自今觀之吳乘楚之得
罪於中國而伐之雖曰因以復怨猶有名也至于五戰而造

其國都係累其人民鞭撻其冢墓君居其君之寢大夫處其
大夫之室棄約肆淫恣行無忌暴橫未有甚於此矣方且揚
揚然自以爲得志也不思國內空虛而於越之兵擣其不備
入其巢穴如造無人之境無乃出乎己者之反乎己也乎春
秋書吳入郢而繼之以於越入吳此事以觀可謂深切著明
矣吾意吳人爲是恐懼而警省也豈意夫勝齊伐魯之後復
駕晉而爭伯黃池有會方將逞其梟雄以長上國不知勾踐
之又躡其後也死灰燃于會稽而太子斃於姑蔑所得幾何
不足以償所喪春秋書公會晉侯及吳子于黃池而又繼之
以於越入吳何其蒙患于前而又不戒於後也嗚呼吳以力

勝楚而越又以力勝之吳以強陵晉而越又以強陵之天道
好還豈不信哉闔閭之時猶曰不備不虞而已矣若夫差何
其愚耶春秋因事而比書之垂戒之意遠矣是故觀入郢而
會黃池宜吳之盛也而於越入吳敗亦隨之譬之蛇豕躑躅
卒以自債不亦可哀也哉雖然吳不足論也吾於此而爲中
國諸侯悲也當入郢之時特以晉不救蔡而吳得假之以爲
功吳興而晉遂失伯騫李一敗北嚮之圖稍輟而諸侯莫之
省也齊衛方助叛臣以撓晉魯方有事于邾而晉則惟納剝
賸伐鮮虞之是務也而皆不以吳爲憂遂使伐陳會魯勢焰
大熾而齊晉大國俱受其患庸非自致之耶然後吳越爭衡
而春秋終矣其可歎也夫

公子結媵陳人之婦于郵遂及齊侯宋公盟齊人宋人

陳人伐我西鄙

大夫越禮以生事而貽患于其國春秋據事直書而自見矣
夫失己失人寇之招也今公子結以國卿下媵陳人之婦既
失己矣媵婦之後遂專事以及齊侯宋公盟公侯豈大夫之
敢敵乎是以牲歃徒陳而反以致三國之伐然後生事病國
之禍見矣結可責也而齊侯宋公亦不得免焉古者大夫之
出疆也受命而不受詞有可以安社稷利民人者專之可也
未聞專命而非禮以致患者也夫人必自侮然後人侮之國

必自伐而後人伐之皆由己以致之况於己爲大夫固當使其君安富尊榮而民無侵陵之患也今一舉而害及其國其罪豈不大哉是故公子結者魯之卿也媵婦淺事非大臣之當親今乃縱其私情去國踰境以媵微者之婦則以尊而臨卑紊上下之分矣彼齊侯者太師之胤尊爲東州之方伯宋公者先代之後爵爲天子之上公夫豈列國大夫所可敵哉今結也因媵婦之行遂及二君爲盟焉夫盟者有國之大事也乃不稟命于君而專之外有以卑抗尊之罪而內有以臣專君之惡一舉而二罪併焉其可乎哉他日西鄙之伐辱國殄民果誰之所致乎則結之罪不可逃矣是故媵婦淺事不

當書而春秋特書曰公子結媵陳人之婦于鄆陳人微者旣見其重以失已矣而繼之曰遂及齊侯宋公盟遂者專詞及者所欲又見其輕以失人也至于西鄙之師而書曰伐見三國之有詞于伐也然則三國義乎曰魯則失矣三國亦豈義哉夫以伯主之嚴上公之重誰得而犯之蕞爾大夫而求盟其從其否誠在我耳訓之以禮義道之以名分不與之盟可也執而治之可也何至以二大國之君俛首與之共軟旣軟之後而以兵刃臨之夫抗尊求盟者公子結也西鄙之民何罪慢鬼神而食話言虐無辜以黷威武不義甚矣吾嘗觀乎文公之經有曰季孫行父會齊侯于陽穀齊侯弗及盟夫以

商人之不義且能卻大夫之請何桓公乃不能慎之于始而悔之于終乎然則結也不足責也齊爲伯主於是乎有慙德矣

公圍成公至自圍成築蛇淵圍

君令不行于陪臣而勞民以自樂甚矣魯之不競也夫佚游從欲己非人君之當爲而况作於患難之時乎是故成魯邑也而疆臣據焉定公欲墮其城而親帥師徒以圍之卒不能克而返是正恐懼警省之時也奈何告至之後乃役民以築蛇淵之圍尚可謂知務乎春秋書公圍成公至自圍成于十有二年之冬而書築蛇淵圍于十有三年之夏則定公之失

君道可知矣嗚呼魯自宣公受國于東門氏而祿去公室矣成公失政而政逮于大夫丘甲之作費邑之城三軍之作中軍之舍不絕于經三家競爽不弱一箇焉孰知陪臣之又專制其後哉至于孔子攝相然後費郈繼墮公室可爲之兆已見于此使其終用聖人魯可以爲政于天下矣雖百成何能爲哉今定公不知三邑之墮出乎仲尼之化而以爲已功也於是親帥其師以圍成而不知公斂處父之徒無君之人也於公何難哉是以無成是無孟氏之言一動疆臣之心而深溝高壘堅守弗下以封內之邑而用師圍之有如敵國已見魯之失政矣况以堂堂國君之尊伐一陪臣而不能勝卷甲

而歸亦可危已吾意定公因是而懼改前轍以自新委國聖人之不暇也奈何恬不知畏告至之後反自肆于驕樂當舉趾條桑之月役農作之民以築囿焉夫築者創始之詞而囿者育鳥獸之所也當閑暇之時且不可爲也而况於蕭墻之寇未弭此何時耶而自放於盤樂怠傲無乃安危利菑而樂其所以亡乎置民人社稷于度外而以奉己爲重顛倒錯亂未有甚於此者矣春秋先書公圍成而繼之以公至自圍成危之之意已見至明年之夏而有築蛇淵囿之書則定公之不足與有爲也明矣卒之女樂至庭而聖人以燔肉去遂使一變至道之國日淪于微弱而大野之麟卒虛其應悲夫吾

嘗觀乎春秋書築臺及囿凡六見莊公一年而築三臺當齊桓方伯四隣和睦國家無事可以有爲而不爲也故魯自是始弱及莊公告終而遂大亂國幾亡成公之時內政歸于強臣而外屢辱于大國末年晉悼復伯稍獲見重而遂築鹿囿昭公游於季孫之術中而築郎囿卒以客死今定公不以先君爲鑒而又履其轍焉嗚呼無囿猶可無民何爲邦分崩離析而不能守是誰之咎哉

取汶陽田公會楚公子嬰齊于蜀

藉勢以復地其利國也爲甚微致賂以從褻其辱國也爲甚大夫爲國而不知以義爲利未有不受其咎者矣魯之成公

恃晉之勢一戰勝齊以取汶陽之田以亂而易亂也其利國
不亦微乎遂使楚人以此藉口而爲陽橋之役公也乃屈于
乘之尊會其大夫于蜀致賂納質以求免焉則其辱國大矣
觀春秋書取汶陽田于前而書公會楚公子嬰齊于後則魯
之所獲不如所喪爲國而不以禮其效豈不深切著明矣哉
嘗謂天下莫大於禮莫強於義是故諸侯修睦以事天子不
敢失也而後蠻彘順令以事中國不敢違也今也友邦冢君
不能和協而使外彘得以借此以爲猾夏之階不亦甚哉觀
成公之所以勝齊而辱於楚者抑亦可以爲戒矣且夫汶陽
魯故田也而見奪於強大之齊攷於建邦土地之圖若在封

域之中則先王所錫先祖所受不敢失墜所當告於天王以
正疆界不當擅兵以取之也不然侵小得之則固有興滅繼
絕之義齊固不得而有亦豈魯之所當有哉今魯之戰齊也
以大夫之一怒而介於大國幸以獲勝則藉卻克之言以取
汶陽而不使一介告諸天子是惟強力之恃而於君臣之義
蔑矣雖取故邑與奪人之有何異哉而不知我以強力陵人
人亦以強力而陵我矣未幾楚人遂有侵衛侵我之師以問
伐齊之故甥舅之國翦爲仇讐而使蠻彘得以爲詞亦已僨
矣而又不能親賢修政保固疆圉乃以國君之尊親會公子
嬰齊于蜀而薦賂焉以周公之裔千乘之君降班失列以聽

于彛狄之大夫豈不哀哉惟其不能以禮爲國以及此憂也
故曰藉勢以復地其利國也爲甚微致賂以從彛其辱國也
爲甚大也季孫行父爲國上卿固當上使其君保安富尊榮
之位而下庇其民使無辛苦墊隘之禍也而乃不忍一朝之
忿殘民以逞其私汶田之歸揚揚然自以爲功而辱逮君父
不顧也方將立武宮以宣示其侈而不知他日韓穿一言復
束手以歸諸齊而所得者爲虛文不足以償所喪然後知不
以義爲利而以利爲利乃有國家者之大患而春秋譏取汶
陽田之意遠矣

太師誠意伯劉文成公集卷之二十終



